

1865-11-18 Nupepa Kuokoa  
Poino i ka Lio.

Ma ke kakahiaka o ka la 6 o Novemaba, ua hoi mai na kanaka hana o ka wili a A. Unna. Ma ia kakahiaka i hoi mai ai o Pipi mai Honomaele mai maluna o ka lio ; ua hana oia i ke kaula lino hou i kaula ilikini, a ua paa loa, a ua hookomoia na wawae ma keia kaula a paa ma na uha. Hoi mai la oia a hiki ma ka Hale-wili, a mai laila aku a ma ke kala o ka hale noho o ka poe ku makahiki, e huli ana ma ka hema, a ma ia wa no i emi aoao ae ai ka lio, a kahuli iho la oia ma ka aoao o ka lio, a holo mai la ke kaula a paa ma kona puhaka, a o ka hoomaka aku la no ia o ka lio i ka owala, a o kona lewalewa iho la no ia malalo ae o ka opu, e peku kahii ana i o a ianei. Komo aku la ke kaula malalo o na wawae hope, a puka aku la kona kino mahope. I ka wa no hoi e owala ae ai ka lio, lele ae la ke kino iluna a haule iho la, ku ae la i ka peku. Pela no i hana mau ai ka lio io a ianei, e hookui ana i na pahu laau a me na paila wahie. Ma ia wa a ka lio e owala nei, a peku ana, ke hoomau nei no kona poe hoa i ke alualu, a me kona haku hana A. Unna, aole nae he loa iki. Holo aku la ua lio nei i kai, holo ae la hoi o Kaohumu a hopu ae la i ke kaulawaha, a moku mai la kekahi aoao o ke kaulakaohi, a hopu hou ae la oia i ka nuku o ka lio, a ku iho la ua lio nei ; a holo mai la no hoi o Solomona me ka pahi, a oki iho la no hoi i ke kaula, a haule iho la ke kino o ua Pipi nei ua aneane e make. Hoihoi ia aku la ke kino o ua o Pipi a hiki i ka hale. Aole nae i mainoino loa kona kino, aka, ua puka nae ma ke poo a me ka auwae ; a ma ka puhaka, ua ula pu, me he mea la ua hai ka iwikuamoo. Ma ia la mai a hiki i keia la, aole oia i ai, a inu, a ekemu mai, aole no hoi e lohe ke kahea leo nui aku. Ua hooholo iho la ka manao e ka lehulehu e make ana, a ina e ola, no luna mai ia.

No Kahului paha, Kona A., Hawaii keia keiki, aia no malaila kona Papa a me kona Mama, kona kini a me kona lelehu. Ua holo ae oia i Oahu, a malaila i loa ai ia A. Unna, ua kepaia mai oia i ka la 6 o Novemaba 1863, a ua hoomaka ka hana i ka la 18 oia mahina no. He nui ka minaminaia o keia keiki no ka ikaika i ka hana, a me ka hoolohe pono, aka, ua poino ia no kona hana naupo. Ua oleloia mai no hoi, he lio hou no ka keia, no kekahi makamaka ona ma Honomaele (he hale aikane.)

E hoomanao hoi kakou e ka poe i koe, a e lilo ia i kumu ao ia kakou, i ole ai kakou e hana i na kaula lino, a kaula hou paha i kaula ilikini no ka lio hou, aole no hoi e hookomo i na wawae a paa i ke kaula. He mau iho la ia, o ke aloha no ko oukou e na haku o ka Napepa Kuokoa, eia mai keia wahi nu hou, hoolawaia iho. O ke aloha no.

J. K. PILIPO.

Wananalua, Hana, Maui, Nov. 8, 1865.